

泊鷗山房集

泊鷗山房集卷十五

會稽 陶元藻

詩一

湧金門旅夜

夜涼歌吹已無聲
眼底漁燈次第生
新食半篙瓜蔓水
靜流孤月入春城

由淳安歸道經富春

紅樹送秋帆
遙邨認歸路
風霜團薄寒
衣襟變新故
悠悠道正長
冉冉歲云暮
遠浦打魚人
款乃煙中去
不寐

月色此閒近蟲聲今夜多前途具汗漫素志已蹉跎祿
養無升斗村居只薜蘿寒雞啼不曉轉聽漏如何

漫興三首

世有藏書癖牙籤甲乙從咀含新意悅漁獵古人逢把
卷不知釋落花紅幾重朝朝窗底坐面熟是西峯

詩是吾家事何須里耳諧青山抱寒郭小雨伴秋懷魏
晉閑誠好錢劉輩亦佳晚涼吟未穩鐙火守蕭齋

郭西聊曳屐一碧水初灣閒坐樹邊石靜看湖上山樵
隨黃犢下禽與白雲還歸去月盈路酒家門未關

東甌襍詠四首

一櫂煙波此去賒不堪回首玉津花龍歸大海蒼茫月
賜斷厓山望翠華

樹樹冬青玉匣封書生偷泣鼎湖龍斜陽寒照漁人網
猶指煙波說理宗

峨峨賜第彩雲浮爭唾羅山寵未休五十二篇宮禁草
蒼颯銜出寶綸樓

瘴雨腥風秋復春城闌一帶水爲鄰江邨爭擊迎神鼓
猶畏浮錢海鬻人

遊鴈宕

乍過老僧巖滿眼觸礪礪離離百五峯濃翠爭餉我二

靈尤雄奇危石若掀簸雕鏤神鬼工天半舞婀娜龍湫
傲匡廬高隨白雲墮客兒屐未經踈漏亦云頗名藍十
八區劫盡法輪火飄零幾僧廬彌勒苔蘚裏參禪吾未
能呈佛句猶可願招諸詎那松下煮茶坐

宿龍山禪院

梵樓鈎幔坐涼氣欲生衣巖黑秋河沒杉鳴夜雨飛隔
村寒犬應微火一僧歸願買雲峯住長年可息機

採蓮曲

畫舫水中央風吹紅藕香藕絲容易斷爭得比迴腸

西湖曲

即如北峯雲妾似南峯雨衝風起湖心吹散在何處

臨安懷古十首

聚景園林秀可餐上皇時傍玉闌干泥金小篆沈香簾
敕賜千官月下看

曼衍魚龍奪化工御樓笑語暮湖中侍臣賦就酹江月
雨露春深下兩宮

暫寄王門一度春菱花雖破未蒙塵南州作客猶稱幸
愁絕樓船北去人

銓前視草鳳箋明酒泛恩波白玉擎聽出百花宮漏靜
君王親唱喜遷鶯

建康旗影自飄揚南渡誰知北狩傷
內侍情深楊太尉
漫將雙玉諷君王

金甌秋色引龍旂德壽宮中看舞衣
按徹玉笙南岸酒
錦袍親賜小劉妃

九溪花竹鑠娉婷嬾畫濃蛾學誦經
薄命已嗟丞相誤
掖門宮草已青青

鳳凰山半夕陽斜大內蕭條宿暮鴉
行到美人盤馬路
可憐遺鏃繡苔花

水似宮羅山似眉遊人爭賦踏春詞
桃花陌上扶殘醉
博得官家一字師

山店紅帘御墨浮梨花無稅重杭州太平天子由來少
不在深宮在酒樓

題涵青院訪半閒堂舊址

巖側悲泉響敗榭走鼯鼠人傳賈丞相攜妓歡晏處孤
魂慘木棉美人委黃土舞袖何時排歌聲猶在樹煙草
思鳳裙遺鈿濺秋雨撼撼陰房寒坐聽蟋蟀語

嶧口渡

嶧波廣且長行行日將午十里一酒邨五里一漁浦籬
落走雞豚隱隱在煙樹春山俯入舟歷舞青無數沙崩
波色渾灘高水聲怒飛師溯逆流挽絳力如虎

四十九盤嶺

羊腸鬱崇山盤幽歷歲月自非金骨仙疇能一蹴越上
嶺攀巖嗽下嶺尤竭屨解衣汗沾背氣哮若病渴回首
胥役徒螻蟻走石骨分明從東來逕轉復西沒回旋不
可窮俯仰兩艱危芙蓉幾點煙落日正飄忽

真奴行

佳冶何足驚所貴在奇節人生結髮妻不如卜姓妾緣
珠能作墮樓人文君已嫁臨邛客從來顛倒本無常我
過章安重歎息符家鬻美姝小字呼真奴輕盈善歌舞
侍立豔絕殊主人一旦騎鯨趨巾箱焚却紅羅襦桐棺

七尺撫一慟耿耿總帳青鉞孤主婦似波奴似石波流
無定石不渝冰炭焉能對同室夜聞鞭血啼嗚嗚蛾眉
忍痛甦復絕可憐垂死無完膚真奴真奴天下無貞芳
詎減秦羅敷

題映燈

寒窗依十載辛苦共君嘗隔素蛾驚影流輝目受涼只
絲羞附熱豈是愛韜光炯炯丹心抱相看不忍忘

湘湖

龜山遺跡想甘棠濫濫湘湖百里長不愛蓴絲愛秋水

結聲裏稻花香

題羊山石佛

羊山高處古祇林，佛骨雕鏤石幾尋。
洞府倒窺潭氣濕，袈裟長拂嶺雲深。
蟲螻莫蝕拈花像，風雨難磨面壁心。
不是如來呈色相，殘崖畱得到而今。

蘭亭

風鈴清響隔林聞，鴛瓦犀簾積翠分。
好竹自環修禊水，青山猶帶永和雲。
溪槎簑笠撐殘雨，野店雞豚飯夕曛。
何處圍棋尋謝墅，風流還讓右將軍。

韜光

折逕不知遠，白雲生滿身。
上山唯見竹，入寺未逢人。

題謝康樂遺照

文章太守是吾師遺像清癯骨相奇
却識吟箋滿山水未曾撚斷一莖絲

雲栖二首

斜日映重巖秋光在毛竹燒香人下山
枯僧住寒綠回首五雲山蒼蒼滿煙霧
但聞流水聲不辨採樵路
晚入北山過涵青精舍

重湖秋氣肅暝色照峻嶒一住穿雲屐
相逢掃葉僧山清寒佛骨林脫近漁鐙
趺坐石泉畔談元得上乘

冬青行

金鳧銀鴈同塵埃玉幣野暴真可哀林義士謀唐義士
冬青樹底悲風來冬青樹蘭亭路寶匣蛟龍夜不眠一
抔黃土神靈護寒食誰將麥飯澆杜鵑紅血空山雨

錢塘晚渡

草橋小憩到江閒獵獵潮頭駕艇還十里風煙橫暮色
螺青微點越中山

謁岳王廟

難忘汴洛舊山川一別朱仙意惘然宰相有心甘賣國
將軍無力可回天淒涼冤獄成三字辛苦征衣負十年
惟有斯王孤憤切幾番惆悵翠微前

咏竹

寒香泥泥落風林渭水波流自古今訝我清貧同此節
與君相對共無心愛從山枕聽疎雨畱取蕭齋看夕陰
無數煙花春後翦一叢曳翠到秋深

咏物詩五首爲先大母胡宜人而作也觸目興
懷不勝感慨云爾

紫薇

幾聚香泥手自培高枝依舊傍春開可知生意綿綿在
花下何人曳杖來

竹簪

筠竹裁成碧玉簪簪殘白髮更傷心一官休去清如水
不蝕朝家半釧金

布帕

尺幅無多樸素完吳綾蜀錦恥同觀儒家風味原如此
畱與諸閨仔細看

念珠

小串菩提破匣藏如珠纍纍夜凝光生平不佞青鴛佛
想見心田一瓣香

紡車

機杼辛勤數十年聲和絡緯夜鐙前仲冬七日朝餐後

猶紡簾筐兩握棉

天章寺

名藍幽竹亂峯閒宋代宗風不易攀
斷碣至今畱劫火
冬青何處認空山
客從蘭渚看花至
僧是婁公買酒還
一抹斜陽明照眼
白雲如絮護禪關

贈戴應良蓬萊爲丞別後有寄

貝闕珠宮海市東
故人情緒宦遊中
祿慳五斗腰偏折
吟對雙松句轉工
翦燭西窗秋幔雨
送君南浦峭帆風
生憎離別空追憶
迢遞江雲囑暮鴻

出郊

城頭草白秋天高歸鴻迢遞聲哀
嗽斷浦黏雲水瑟瑟
長林擺葉風騷騷松醪試向村店
索蘭舟便喚家僮操
西陵人來塘上語明晨渡口觀江
濤

花塚和周西序徵君原韻

亂紅餘紫一抔存小飲誰來對酒
樽蛺蝶曉風憐賸粉
杜鵑殘月夢歸魂馬嵬香盡春無
影銅雀心灰泪有痕
好倩如花校書女爲題芳碣到雲
根

種山

長喙難與居大夫不自保徒羨陶
朱公拂衣五湖早

題南鎮酒肆

門對寒山氣次寒
梨花小甕暗香飄
前村月黑無人語
虎拉栖豚過石橋

詠史

帝業空傳二世餘
炎劉赤幟竟何如
百家燒盡愚黔首
未火張良一卷書

山曉

寒山初破曉
晝意許誰論
虎跡深留雪
人煙淡隔村
凍流無潤汲
餘響有松存
僵徹袁安骨
春風應到門

詠鴈

寒驚關塞氣
蕭森南國風
霜幾度尋湘水
蘆花情宛宛

江天明月思悵悵一聲秋落三更夢雙足書傳萬里心
不爲稻粱輕入世弋人何處用機深

散步

散步城西路山村繞白沙風聲亂流水秋意在黃花飲
犢溪邊路炊煙竹裏家田翁一相見拍手話桑麻

寓園弔郝忠愍公殉節處

遺弓遙挂壽皇松無路攀髯一死從終古方塘明月夜
懷沙魂坐柳陰重

過金家庵

散步出春城將投名藍宿雨斷文暉中芳郊被新綠閑

閑十畝閒桑麻
襍麥菽到門僧未逢
磬聲度深竹

蠟梅

黃香風味雪中尋
色洗薔薇露獨深
等是孤高鄰處士
倍憐消瘦對長吟
濃分宮樣新塗額
碎拾仙家舊點金
釀蜜藉花花似蜜
却教惱亂化工心

秦望山

沙邱揚腥風
野火燒宮闕
光嶺雲山高
猶見秦時月

江上

一棹水西涯
關津尙阻家
野祠紅映竹
江日白移沙
秋掃山容淨
風驚鴈字斜
未知三徑裏
菊放幾叢花

古意

暮院涵秋光蘭橈集虛景沈沈夜鐙花流輝照孤影怕
倚芙蓉屏懶疊鴛鴦枕輾轉不成眠玉釵墜雲髻朦朧
見遠人關河夢初警酸風響簾鉤銀蟾下金井

橋東二大樹爲大風所拔

橋東樹襍楓樟柳雙喬對峙摩青天枝交榦錯狀奇倔
父老相顧忘其年颶風夜半入郭裏怒撼根骨青脚起
頽雲倒雨塞溪流熊羆僵臥虎豹死憶從兒時學吟哦
每愛層陰坐橋側綠扇長風却暑心寒護草堂成野色
奇材違衆天所怒棟折梁摧我心苦眼前豈無桃李姿

萬事更新不如古

哭亡兒廷璧

藥爐顛倒火猶溫
冷淡煙光掩墓門
不獨閨幃憐少子
幾拋書卷哭黃昏
夢疑兩閣牙牙語
鐙照秋床黯黯魂
手觸巾箱紅繡襖
傷心怕見舊啼痕

過西莊

阡陌古原下
綿綿足稻孫
寒城背流水
煙樹卓孤邨
日色初隨兩山光
欲動門靜看扶杖叟
籬畔喚雞豚

江邨

鳬翁歷亂水雲鄉
烏柏經秋葉正黃
嫋嫋西風起蘋末

幾堆漁舍酒波香

城南

緩步城南筍屐輕板橋微雨報新晴一溪綠淨真難唾
滿逕紅香不忍行濃柘影中屯社飲夕陽原下散春耕
倘教小李將軍見幾許霜毫畫得成

西溪觀梅并遊張莊二首

操我沙棠舟言赴西溪曲疎梅夾清渠掩映頗不俗雞
犬時一聲林梢出茅屋青雲滃板扉出汲女鬟綠綿邐
羅浮山盈盈送春日

張園一萬樹姑射神仙居茫茫浮雪海雲色相模糊鴻

濛清氣合那知香有無瓊英團酒榭參錯銀槎俱頽醉
不忍去還傍瑤林趨枕藉古根畔風片蒙髭鬚

自西興歸

漁商歷亂趁歸程獨放中流畫鷁輕十里河清憐酒渴
半塘風起覺寒生辭秋黃葉隨吟客帶雨青山入縣城
推却烏篷更回首西陵猶送暮濤聲

遊解心山寺

野田傍邨墟溝塍水盎盎舉首見秋山山容雨餘養亂
峯青欲下一客影初上窗扉當落暉竹木遞清響流雲
宕鐘魚空巖走龍象香積供肴蔬泥飲脫塵鞅來日知

正多當着屐幾緇

東周青厓

夕陽江上結鷗盟
換柁歸來別緒生
蟹舍寒鐙如夢寐
杏花微雨又清明
魚紅手訂唐三體
蟻綠樽消漢兩京
記取故人樓筍約
再乘新漲出南城

湖上

風爐蟹盞自相關
分得林逋幾日間
打飯僧逢三竺路
賣魚舡喚裏湖灣
人行雪霽煙明處
詩在花南水北閒
小憩最宜靈隱好
寺門貪看大癡山

宿招賢寺

森森晴川好渡杯禪扉長倚水雲開人投紅葉寺中宿
秋向白蘋洲上來活火茶香連几榻夕陽嵐翠滿樓臺
鐘鳴晚飯僧歸院誰解清談似辯才

蕙妹學琴於余授以落鴈秋鴻等曲復詩以示之
萬籟寂庭宇絳徽發清音秋高集鴻鴈明月瀟湘深授
受在膚末微妙本因心智者能自領神理方沈沈

登北高峯

懸磴陟崔嵬白雲攬盈把萬象羅心胷風雷走其下江
聲到海門一息千里瀉四顧湖上山卓立競秀寡惟有
南高峯遙青接僧舍

重過雲栖

蓮池飛錫處參佛往年曾屋向盤幽置人從積翠登松
雲流講席竹雨灑吟鐙塔院菩提下重來問七能

理安

空山古道場松磴頗幽絕高懸講院鐙下照陰崖雪

弔韓棟

銜星拂電芙蓉裳天門詖蕩驂鸞皇玉樓高矗浮雲翔
龍螭蜿蜒蟠雕梁文成泱泱瀟與湘色絲少女邯鄲僵
人間婦女哭黃腸素旛影裡神沮喪漆鐙明滅照北邙
陰雲慘慘日荒荒狐鳴鵠鳴其旁金刀掩夜我永傷

魂兮歸來歸草堂我生交好多老蒼愛爾髦鬣揚芬芳
蠡城旅舍火珠陽紙窗小雨啼寒蠶銀缸對剔語竹床
烏皮几上生秋光黃雞白酒紅粳香銅雀小硯松煙颺
蠻牋分韻韓冬郎此夕何夕五度霜可憐兩豎來膏肓
風摧瓊樹聲琅璫予才輸與昌黎強張童子序垂大唐
哭孫人岳名祚蕃余內子之兄也多才績學性孝
友爲人有氣節與余交最善幕遊於洛五載不
歸而死用賦二章以弔之

遊子已隔世衰親尙倚閭未乾臨別淚不見再來書時
事多參錯天心非古初謀生偏得死何不閉門居

肝膽人云逝悲哉吾道艱何時歸白骨無路哭青山
燈火橋邊語自下方橋同夜風塵夢裡顏招魂空翦紙潸
潸大河開

寓湖上傲溫飛卿體四首

淡抹穠粧鏡裏探煙霞峯北接峯南橋邊響玉溪迴九
樹裡通禪竺有三看月樓臺依水密賞花裙屐到春酣
岳家墳與于家近觺觺麒麟出曉嵐

湧金門外草初芳到處啼鵲惱客腸一櫂煙波浮鴨綠
幾橋新柳染鵝黃畫樓簾揭菱花吐山店風吹竹葉香
爲問鴛湖蘇小小幾時油壁過錢塘

碧桃花與綠楊齊墜。寫遺詞在兩堤。畫舫有歌皆白苧。
澄潭無處不玻璃。水籬煙暖紅魚擲。桐樹花香翠鳳啼。
一十二橋吟已徧。玉驄馱醉入雲栖。

湖邊蟋蟀盡風流。曾向平章宅裏遊。菡萏香銷花港雨。
芙蓉紅上段橋秋。苔明金鏤晴盤馬。釵墜銀鐙夜築毬。
壚畔蕭娘鄰宋姝。江南如殺十三樓。

泊鷗山房集卷十六

曾稽

陶元藻

島

詩二

泛舟滌湖

鴉啼湖上樓日隱橋東堰煙末認魚標網與浮花卷圓
沙宿鷺多勸我篷窗飯洲虛得月深帆輕受風淺市火
引船明荷香去人遠方外煮茶僧高蹤想猶緬

題周青崖書屋

籬落江邨絕點埃蟬紅竹素佐春杯多栽堤樹貪聞鳥
輕掃庭花怕損苔一翦煙波到門住幾分明月過橋來

要從北垞窮南垞閱盡王維畫稿回

贈胡禹聞先生

梁園賓客漢鄒陽頭白歸田話孝王不道一官稱令尹
翻成長餓等翳桑門羅寒雀苦無轍腹壅枯蟬舌有芒
史館何人傳循吏臣心如水是莊浪

宮詞四首

景陽宮殿月遲遲狎客開筵競賦詩敕賜魚紅箋一幅
教從花下和袁姬

五宅休言鳳輦馳馬嵬煙草葬相思華清秋月金雞夢
猶見遺鈿墮馬時

幾經畫額侍君前
無柰花媒信杳然
拉得斷腸諸女伴
沈香亭上簇金錢

上巳春開白玉扉
青娥十院散珠璣
雲藍小袖銀鸞扇
亂入花叢撲蝶飛

壽州

落日照平楚
悲風滿客船
英雄空割據
流恨指長川
組練耀天地
秦漢相比肩
嵯峨楚宮闕
橫截雲霓前
我昨經人公
草木皆髡鉗
東晉猶朝露
何況秦苻堅

宣城道中

臘盡宣城路
扁舟獨客還
凍旗懸酒屋
晚火出魚灣
竹

洋國山房集卷二
塢雪中綠柴扉水上關篷窗幾回首難別敬亭山

燃犀亭玩月

犀火不復舉龍宮空自寒亭高驚石陡月白俯江寬靜
氣生羣峭浮光湧暮瀾坐深清到骨遺世碧雲端

登太白樓

慧芒下照長安土洗出妖兒養成虎誰識英雄在事先
憂危一片丹心苦射狼長矢待汾陽脫卻朝衫挂江樹
江波浩浩浮一航玉簫金管臨風揚酒闌喝月月不走
翻身踏入蛟龍堂白雲飄搖自來去青山采石遙相望
君王自醉臣自醒可憐冷落沈香亭

過廣濟禪院

經轉蛾眉夜色渾
離離佛火對漁邨
松花滿院無人掃
月照江聲到寺門

琴溪曉發

曉發嶺州境雞聲聽未殘
亂營深碧映折路暗流盤
霜月沒遙漢籃輿生曉寒
琴高控鯉處橋畔撥雲看

遊齊山

池陽門外翠氛氤
水鶴巖猿繞路聞
澗勢近疑眉際落
峯形細自掌中分
人從柳市通寒騎
僧傍山門掃白雲
笑口大開花壓帽
琴亭一弔杜司勳

泗州

洪澤汪洋接泗濱
沈灰何處認前因
歌風慷慨雄亭長
挂劍蒼涼感故人
鐵絙千尋羈水怪
浮圖七級接波臣
濟川豈是無舟楫
獨俯長淮一問津

玩華亭望九華同觀補亭侍講賦

峇崑石骨露秋稜
青下軒楹勢欲崩
薜荔陰中嘶過馬
木樨香裏坐枯僧
一村人抱煙霞病
千嶂旂迎日月燈
惆悵文成入山事
那堪凭檻矚崢嶸

廬州舟次

一櫂煙波上鄉書
鴈未傳離懷
秦望樹秋色
汝陰船山

溜爭魚薪月雲入蔗田閒餐舫樓飯長對水鷗眠

題桃莊院本

夷門公子勝秦川悽愴東南半壁天
跋扈將軍飛羽檄風流宗伯典釵鈿
孤魂冠劒梅花嶺紅燭笙歌燕子箋
聽徹梨園新法曲秣陵春斷草如煙

過秦淮倣溫飛卿體

幾度江南放客懷煙花檢點到秦淮
烏衣舊巷聯吟社紅板荒橋問酒牌
荳蔻拂衣香似麝菖蒲侵襪小於釵
簫聲宛轉行雲裡偏隔三山兩疊街

全馬十三湘靈儲大藥坡王四圖南胡大廷枚譙

醉翁亭入瑯琊寺出遊豐山登豐樂亭歸經龍

潭

靈區秀盤紆幽討發遺蹟醉翁不復來寒亭迴如翼檀
欒修竹閒欄檻錯以列牆下歐公梅玲瓏屈瘦鐵釀泉
穿枯根噴漱古時雪敲火炙腥肥煮茗拾楮枮吟牋各
飛騰賓筵任狼籍秋山無靜林荒寺有逌客松枝欹澗
扉藤絡墮崖石夕陽明前山豐樂在咫尺籃輿曳殘霞
馬蹄帶寒碧村聲喧亦閒稻塍近復折平原忽崔嵬雲
氣沐巉壁下有百
六水色黝黑陰森空洞中咳唾
作霹靂言歸滁東門酒火倚壕赤回首西南峯遙挹瑯

邶月

弔施澹吟二首

吾友真英物文心吐八荒年華方盛滿天道竟蒼茫玉
樹凋秋早金刀掩夜長黃公酒壚在灑泪一霜裳

書生塗路狹辛苦嚙殘編漂泊已堪恨山邱更可憐遺
文光掩斗雛鳳翮摩天何處吟秋水江皋幾點煙

插花行

秦灰黑鴻溝泐美人歡笑生顏色亞父歸垓下圍美人
淚落無光輝如花貌碎鵑啼苦繚繞花魂廟傍路片片
紅香逐曉風分明帳下當年舞小像停雲幾度秋寸心

長抱江東土石榴子何離離宜男草何紛披不如瓣香
深夜禮虞姬玉簪金雀白茶蘼大姑小姑筠籠提長袖
女巫向前祝願神早賜寧馨兒酌神大觥爲神壽楚簫
蠻管揚靈旂高后荒陵頽石馬此廟插花無盡期

天竺一名天竺俗傳其種來自西竺國因戲作一
章

人天師駕來西方陀羅花襍貝多香別攜嘉種入中國
枝枝葉葉如叢篁未聞敷華已微實垂條結葉紅映牆
舍利子呈璀璨色牟尼珠吐玲瓏光傳疑傳信幾千載
差勝紅豆生山莊哥蜜寒滴勝瓶翠煙雲供養清虛堂

恒河沙數春汗漫一破岑寂傾壺觴

都梁山

離離三十六宮微休問都梁舊舞衣宿粉曾從芳澗落
亂螢猶傍暮山飛春風御柳橫寒黛明月銅駝望翠旂
回首燕城鼙鼓入夢中難別麗華歸

渡淮

一棹水中央揚帆去路長天風吹雨白雲氣接河黃岸
澗胷無碍波鳴酒欲狂盱眙回首處山色半蒼茫

馬相如舍人歿其弟湘靈屬余索遺稿於沈平山
處因題二絕於卷末以歸之

湖謝誰憐杜紫薇至今春草夢離離遺文何處求封禪
拾得江東絕妙辭

山陽人去笛聲秋斷紙零縑小宋按七字淒涼三月客

不聞鶯語住揚州

舍人曾寓揚州天寧寺有詩云客到幾人曾跨鶴我來三月不聞鶯爲世

傳

酬補亭侍讀贈青陽扇

繭紙油明鴉色深鷓鴣斑竹映紅金分明畫出銜蘆鴈
風起瀟湘萬里心

過震澤

高天雲欲下浩浩一川陰岸葉辭人早湖秋接艇深浮

沈洞庭影汗漫故鄉心底定何年事寒流自古今

瓜州舟次

席挂長風掠暮汀寒濤聲裏獨揚舲好山都在江南岸
一片斜陽佛髻青

遊桐城張氏北園四首

昔聞南垞勝今到北園來老樹千章合靈巖一面開鳥
憐花頰倚廊避石根迴贏得王裴侶分牋藉徑苔

瑟瑟小池秋芙蓉入鏡流談經揚子宅載畫米家舟風
細蝦鬚靜泉香雀舌浮片雲無管束飛過翠微樓

幽趣渾無盡真機本有餘始知丞相墅不異野人居冉

再成行竹鱗鱗計寸魚繁華舊金谷絃管竟何如
欲去猶回首寒林挂夕陽城闔自迢遞山水益清蒼
霜葉紅隨馬煙嵐紫近裳何時連玉轡重過藕花塘

虞姬墓

英雄功不就粉泪灑江雲歌舞誰爭寵孤危敢背君
野花垂血頰寒蝶思羅裙一半鴻溝地空畱幾尺墳

白門襍興五首

秣陵渺渺雨絲垂蕭瑟江頭畫角吹數里蔣山青到郭
春來猶拭小喬眉

莫愁湖水滑於油驄尾風吹蘸碧流誰唱范雲鸚鵡曲

杏花小雨一層樓

曉發宮車夜未回
繡經長上雨花臺
如何祇樹雲幢在
不蔽青絲白馬來

胭脂痕透石闌斜
月冷雙桐宿暮鴉
傳與燕城人不信
迷樓仍唱後庭花

桃根桃葉翠鬟齊
渡口無人鳥自啼
聞道小姑猶有廟
畫船輕雨過青溪

巢湖晚渡

平遠寒山暝色中
白蘋花裡急西風
茫茫煙水秋無際
祇有詩人一短篷

盆梅

芳標本奇特盤屈竟如斯春意來何晚冰心默自持寧
爲孤客伴肯受野風吹珍重一枝豔清芬無盡時

將復遊吳中辭 先大人殯所

幾度呼天灑淚重竟無一夢許兒逢病中殘藥封猶固
紙上遺言墨尙濃三載遠遊違杖履百年長夜隔音容
何時膚髮歸全去得向泉臺覓路從
落落饑驅露肘形忍拋苦塊役行羈弟兄慟哭循陔句
風雨淒涼望考亭負米那堪重陟岵傳經何日再趨庭
秋霜欲墜靈衣冷滿眼寒山擁亂青

題蔡君謨萬安橋碑帖後

雙碑矗矗垂青蒼百五十字真鴻章鸞翔體勢晉楷格
誰其作者宋蔡襄側聞海倭好巨石長繩曳倒萬首扛
盲風怪雨霹靂闢支祁罔象撓歸航雲陰慘慘天靈防
驚濤滔滔篙夫僵叫號樓船聲沸海須臾一石沈中央
或疑咸陽三月火或云照乘珠生光穹龜長魚負之出
淋漓重峙更補亡新鐫粗疎舊鐫巧雌雄相向成低昂
荒唐事並六一叟瀧岡阡表歸龍堂憶昔曾遊八閩地
肩輿直上鼃鼃梁沐日浴月鴈齒下水門歷落吞帆檣
祇今燈火松窗底猶見碑光接淼茫

星巖

中流一拳秀石罅，
噲鳴江風吹白雨。
雲與山逢迎，松
篁匝寒翠。深淺崎嶇生花香，
天界落佛火林端。明方滋
採藥興，翻擬浮家行。徘徊波上巘，
坐聽鉤輶聲。

敬亭山

我本剡溪人，來作宣城客。
蒼蒼敬亭山，橘柚香可摘。
細磴挂斜陽，荒筠翳寒石。
酒榭未傾頽，簷楹架空碧。
下瞰雙虹橋，秋水生遠白。
沈吟供奉詩，仙風起蠟屐。

金山

扶桑起朝暾，金碧映縹緲。
鐘動大羅天，龍宮破清曉。
鼉

鼉足底翻獅象雲中遶院院枕江聲戶戶出林杪秋陵
北固高潮束瓜州小吳楚壯東南晴空見了了

焦山和東坡先生原韻

摩空龍象形耽耽金山交翠撐天南江聲澎湃起佛腳
誰移鰲背神山三中州無梁客罕到寒僧懶臥如春蠶
舟師忽駕高浪至彌勒獻笑縉流慙華巖寶蓮兩幽絕
下窺雲壁何潭潭海潮未來波妥帖長鯨巨鼉睡正酣
拗松作塵時一憩翻思坡老同清談陰濃古樹綠到戶
琉璃小紅駐密龕楮枳烹泉味亦好豈必一勺中泠甘
華陽真逸痊鶴語爬梳詎厭書家貪雕鐫石骨半磨滅

物猶如此人何堪峭帆驀挂嵐影外詩情尙寄雲聲庵
溧陽舟次

漠漠平陵路荒邨何處投酒寒鄉思切月黑櫓聲幽雪
樹迴流岸風鐙獨客舟篷窗開復掩不寐擁羊裘

題龐景軒禦寇錄

屏藩大吏矜貴寵風鶴遙聞早震恐嘉魚令尹飛將軍
今日方知宰官重武夫赳赳好論兵旄頭草檄檄不成
天授龍韜陸川士使人不敢輕書生蒼鵝鬪舞狐跳梁
蒲圻失守民走藏荆襄門戶誰作鍵危如累卵須臾亡
可憐士卒不滿百掘堤匿輯爲金湯五十日夜席勿煖

拒卻八萬紅巾僵當時豈乏貔虎羣軍書十上九不聞
浮圖飄飄大羽箭傷心終古南霽雲當年豈乏忠義伍
半屬迂踈昧時務長江天塹險阻奇誰道燕兵竟飛渡
士元原非百里才封侯不得歸去來鳳雛之譽空悲哀

曉行

旅館畱殘夢征蹄又一村踈星寒樹杪微火遠山根
霜逼晨光肅雲融日氣渾人煙炊不飢幾處啓柴門

題章毅齋遊擊遺照

喬松謖謖驚濤長斑龍欲走皋禽翔雕闌廻互屏繡錯
翻階紅藥春風香鴛鴦之瓦玳瑁梁文螭之柱幽蘭堂

中有昂藏七尺鬚眉蒼側聞將軍聲譽早學文不如學
劍好秦州佐郡未五年寧夏蒼鵝亂於草羽書絡繹求
異才幾處狼煙手輕掃功高李廣不封侯忍使英雄竟
枯槁此圖烘染真良工結構不與尋常通遺容十幅存
四幅處置各變形神同君不見茫茫戰壘行人絕白是
枯體碧是血銀甲瑯戈等劫灰沙蟲猿鶴誰區別涕泗
應霑司馬衫丹青猶識將軍袂古色斑斕滿素綃團花
衣錦金磨滅迢遞遊魂月下歸風泉寒繞何山咽

賀馬湘靈納姬二首

酒眼相憐入夜深鐙前擁髻思悄悄砌綠縷帕香熏就

繡出滇南萬里吟

芙蓉斗帳雀爐溫
小字田田呼斷魂
料得挂弓擎阿買
夢腸容易繞吳門

哭亡兒廷瑗

如夢如真反側求
方知生死等蜉蝣
呱呱相對而兄泣
舊骨新魂共一邱

望家兄菊坡書信不至

行役縱無恙
其如望遠何
涼風生木末
秋思入江波
荻漈魚空釣
雲天鴈自過
鐙花如可卜
昨夜爲誰多

寄無錫胡廷枚王圖南并懷桐城馬湘靈

丁卯八月理短舫秦淮河畔欣重逢高樓置讌邀我飲
濁醪一斗澆塵胃秋暉紅照酒人眼兩花蕭寺飄踈鐘
寒苔閒曳阮孚屐石城還睡清涼峯明日離亭別君面
峭帆斜翦澄江練船窗諷誦蒹葭詩浮沈雲水金焦見
迴洲孤泊夢江南吳天月白蘭陵縣諸君各各騰才名
雄談復念龍眠生龍眠馬氏白眉最七言奇句今長城
三年出處無消息人傳側帽楓橋行不知詩鬢成何狀
添得吳霜又幾莖

遊惠山寺

珠宮負崇岡青巖入幽靄襍樹根糾纏枝柯挺相對曲

磴覆層陰天光失明味莊嚴文殊師清淨琉璃界龍象
紛盤拏旛於振虛籟詩朋肇唐年臥碣苔篆碎竹爐妙
工缶品茶客安在時聞玉琤瑋名泉落巖內窈窕饒靜
觀水石恣殊態古藤壞檻絡寒花斷崖戴消夏境固佳
吟雪興亦倍

與王圖南昆季飯惠山復得一律

泉光融樹色倒映上衣巾白酒殊鄉味青山似故人佛
嫌摩詰佞齋笑太常貧鴨脚依依好空檐幾度巡

飲第二泉

乳竇破巖岈甘美中冷派好風生漣漪空明竹光碎候

浦陽山房集

卷六

詩

七

火煮芥茶蟹眼弄清快擾擾飲泉人知味有幾輩疇曩
無陸生一勺誰寶愛焉知華池液不蔽榛莽內持甌重
踟躕寄喟青山外

遊秦園

戒塗得良儔睠彼林塘霽苔級人影重木杪禽聲遞落
落西窗閒青堆小螺髻提榼古蘿陰支頤坐寒翠誰爲
聚雲根幽秀編隙地紅霞散池東日傍魚梁墜窈窕惠
山臨忽覺明粧毀模糊籬柵煙殘繪無倫次放舟水楊
村前浦起涼吹

渡揚子江

泛宅緣何事蒼茫一葉舟山根斷京峴樹色辨瓜州亂
白帆爭下空青海共流中冷泉穴近還許煮茶不

揚州懷古二首

走馬隋堤問酒牌殘陽一片舊宮街春耕不到雷塘路
更有何人拾寶釵

如縠煙波廿四橋情人猶有鳳凰簫竹西歌吹風流甚
不賦蕪城學鮑昭

高郵道中二首

清淺迴塘下江梅未放天枝欹人側帽雪漲岸平川市
語漸通竹酒香時到船一瞻淮海宅詩思入江煙

風厲鴉聲急冰融日氣渾
冰從洪澤下祠有露筋存
帆勢入平楚湖光接縣門
黃沙前路濶重眺蟹簾村

漂母墳二首

憐才終古識一飯豈云恩
落日青楓樹蕭蕭映墓門
我亦釣魚人魚竿冷江色
手翦淮陰蔬爲君作寒食

遊碧霞禪院旋登觀音閣遠眺二首

負郭名藍靜何年古道場
溪光圍定袖竹氣盎齋廊風
峻懸鈴語天寒臥佛僵
雨花飄不盡妙偈發真香

傑閣諸天上登臨萬象侵
人煙生麥秀帆席落城陰
高寶風濤壯淮黃䟽淪深
滔滔誰砥柱彌切濟川心

過陳琳墓

湖水蕭蕭翁仲寒
白蘋紅蓼映衣冠
淋漓詞賦雄河北
板蕩江山憶建安
記室本宜才子作
頭風還索羽書看
曹家原有賓賢館
何事禰生罵阿瞞

淮陰城下懷古

三分割據豈難成
有動烏江刎後兵
梟后有心移大寶
孤臣何地保殘生
亡歸國士羞人伍
飯起王孫作狗烹
慟哭長陵一抔土
僞遊雲夢信陳平

過邳州懷古

大索英雄此遁藏
風煙漠漠月昏黃
功名應遂封畱願

帷幄何來辟穀方三寸舌談真磊落一編書授豈荒唐
韓仇早報沙中擊未必稱臣事漢王

寒松

風烈骨彌勁冬深葉豈消青根趨雪澗寒影卓山橋舉
世爭新豔誰人問後雕披裘三逕畔閒聽落江湖

續圓圓曲

余嘗讀梅村圓圓曲清豔絕倫寓意深遠第聞
圓圓入滇後知逆賊事必敗預托元門卒免於
戮而梅村已老死矣此事遂不復見諸咏歌嗚
呼一巾幘女子耳竟竟見幾自保不過人遠哉

爰續數韻以補梅村所未逮

黃埃四起侵朝旭羽林將士提戈促龍髯已斷臣不知
只惜紅顏美如玉詞客青衫濕泪痕微言隱刺霜毫酷
寧割千金莫割詩將軍長恨圓圓曲圓圓生劫烽烟路
眉蹙春山膽驚怖強倩人扶就鏡臺金菱閃爍梨花吐
一縷歌聲繞屋梁纖塵不染凌波步巧笑能靡按劒威
丹唇慣解衝冠怒頓使從行百萬兵不畏將軍畏瓊樹
此時矜寵真絕殊此時悽愴偏無數憶昔將充掖庭選
田寶豪家列歌院迴風十部學初成賊勢倉皇走如電
賤妾能離虎穴時銅駝已繞荆榛徧歸嫁周郎席上賓

纏頭豈是中情戀麗華未入景陽宮太真不上長生殿
今日已羞龍作蛇他年能保鶯隨燕此意難教夫壻知
闌干偷濕芙蓉面鸞幃鴛帶非所歡元門聊借一枝安
雲旛巧刺鸚鵡活梵窗倦罷琵琶彈香鬟欲剪不忍翦
魚紅細搗金經看仙乎天乎那可卽猶聞翠珮鳴珊珊
奸黨縱橫狐復鼠天朝遙下滇池旅黃旗大鉞掃妖氛
血濺如花滿樓女教曲蛾眉詬白門鴻飛冥冥知何處

泊鷗山房集卷十六終

泊鷗山房集卷十七

會稽 陶元藻 鳧亭

詩三

盆蘭

好護黃磁斗休教積霰侵因依憐歲久蘊藉識根深芳
氣常在室故人有此心烏皮書几上清供伴孤斟

冬日賦笋得掘字

幽篠蒙屑阿寒綠蔭石骨下視土敷腴犢角埋蘭栗廚
貧堪膳稀野賴厭薇蕨健僕事鷄鋤如貌怒爭掘所悲
竹箭良干霄在倏忽雷雨來何遲泥沙若淹沒拳曲守

深根無由脫穎出幾同尺蠖藏蘊藉嚴寒月朔風吹不
僵層冰裹猶活長材富調羹短用氣欲奪我類東坡翁
愛竹成癩疾時參玉版師法喜並禪悅髣髴魯璠璵片
片崑刀切先爭元燕來恥與朱櫻列冷譙園紅爐鮮新
飫喉吾生誇烹雪清絕笑煨芋拙老饕吻彌饒甘美戀
此物飽餐訪戴舟大嚼尋梅日

簡儲藥坡

罨畫溪頭避喧路夾岸魚簪挂高樹柴門籬落幾家村
所謂伊人此閒住咀含經史筆老蒼燒鐙永夜吟咏長
淵源每溯在陸叟禽魚時詔青山莊青山莊廢生荒草

讀易先生亦辭制臣饑豈獨東方生惜汝無兒鄧伯道
種茶唐貢三畝餘斃槐香清伴衰老

泊丹徒口

落日南徐外秋光入杳冥江雲連嶼白漁火隔林青遼
塞幾歸鴈吳天一客星來朝挂帆去何處水邨停

杏花邨

步出池陽門盎盎和風薦春山何逶迤參錯雲石面村
墟起孤煙繁英照芳甸酒帘自飄颺牧豎時隱現坐看
夕陽遲醉聽禽聲變緬想杜樊川風流不可見社燕戀
荒祠銜入紅香片

慈恩山曉發

喔喔荒村雞蕭蕭驛亭馬念此轉蓬身曉發慈恩下山
色何蒼茫泉聲暗傾瀉淡月映平林寒鐙見茆舍迴塘
聚羣蛙鼓吹在田野撲面流螢多浸水繁星寡炎官不
敢驕長夏氣瀟灑

采石阻風

感慨辭家客蒼茫滯水涯長江無穩舵斷岸有驚沙山
鬼吹漁火靈鼉蹴浪花幸依丹嶂下終日飽煙霞

出滁州南城至瑯琊

春雨歇南郭波添綠幾灣杏花斜日路僧寺白雲山行

到賞心地醉看飛鳥還深林懷永叔惆悵翠屏閒

杜鵑行

桐城馬湘靈築生壙於龍眠山下周迴盡植杜鵑花春時爛熳如火湘靈常攜酒讀書其中因作杜鵑行一篇以贈之

杜鵑花紅綿綿陸渾山火及原田滕公石擲隱花裏閒來抱蘂花中眠毫端簇簇蠶飼葉天心月腋手可穿嗟咿訾呬學不就獨行恥受夔蛇憐藍衫破帽蹇驢背長安秋雨淋十年不如意事真八九滇南萬里趨蠻煙歸來落拓空老拳只有殘箋餘蠹言五千松風隔水作鸞

嘯鵲花依舊春風燃杜康沈沈何日醒仰天大笑流雙涎

于耐圃侍講有悼亡之感詩以輓之二首

雪捲銀河斷鵲橋嬾星掩彩夜迢迢眉峯畫隔餘雙管
粉水香寒憶六朝璜佩尙傳鍾禮則門楣原屬漢金貂
芙蓉鏡下人惆悵空步芝田賦大招
春光相背去堂堂屈戌光寒照洞房退食有誰稱舉案
朝衣若箇更熏香好花乘令開時短明月經天缺夜長
卻恨當初射屏處至今湖水號鴛鴦

送于君冑熙載昆季歸金壇

江風蕭瑟氣森嚴只少梅花插滿檐小閣青山歸謝眺
斜陽新恨賦江淹蟹奴魚婢餐應美酒頌茶經注可兼
五字河梁千里夢共尋吟舫揭蘆簾

迎

鑾詞八首

朱方䟽瀾禹功恢欲斷隨刊仙仗開萬里河流清到海
卿雲深處翠華來

瓜步春波鴨綠浮杏花紅點羽林裘千帆擁渡江南岸
風颺龍旗是

御舟

六飛琴麗下錢塘

聖祖離宮竹木蒼
臨湖別開丹鳳闕
月波流入舊昭陽
湖畔笙歌叶鳳韶
桃花得氣柳枝驕
分明八駿籠黃帕
行過紅闌十二橋

雲林佛屋古招提
扇導慈寧雉尾齊
問寢

璇宮天欲曙
滿山花雨叫金雞

蘭亭鴛鴦碧參差
影襍紅鷺漾
墨池父老獨窺
宵旰意迎

鑾先在夏王祠

繞路秧鉞縱復橫
農歌都作太平聲
南來不爲山川美

要及春風徧省耕

漁莊蟹舍越連吳

玉輦亭亭入畫圖
夾岸華燈齊吐燄
萬花叢裡聽嵩呼

冬日寓紫陽書院二首

朔戶風吹落木天
寒崖暫息旅人肩
摩挲牘蠹書三篋
牽確堆雲石幾拳
問字恰宜歸鹿洞
看松何幸到平泉
夕陽明處更東望
家在青山一髮邊

竹闌干畔步徐徐
布襪青鞵亦晏如
眼底江山爭白下
樽前人物過黃初
明鐙池館鈔書靜
涼月藤蘿映榻虛
自笑前身謝康樂
煙霞到處有吾廬

過墨汀訪徐笠山先生

早春天宇和扁舟往南浦山色爭堆藍空江響柔櫓鷄
犬忽成村三椽映桑苧鴨頭水疑染麋眼籬可數園蔬
香到岸林花赤連潏瀟灑笠山翁鬚眉照平楚忘年張
鏗交倒屣蔡邕武攜手鍛竈旁掃逕聽鷗處溪邊酒眼
青竹裏談鋒豎鮮肥縮項魚精鑿長腰黍薑橙佐兔軒
椒桂錯雉脯臨流羨無窮不醉寧歸去君家伯調公詞
壇作柱礎鴻都結敦槃上客贈縞紵相望數十年豪傑
重起舞自笑螳螂臂要張百石弩遊心在五原命意及
三古綆短汲正深研索忘鈍魯聊剪刻藤箋來訂斜川

譜

五廣文赴任贈行五首

送黃虞山之湯溪

落落晨星天一方，平津賓客下錢塘。
雞催離夢山村曙，雪裹寒氊水驛長。
走馬佇看來上苑，種花休恨失河陽。
無雙譽重皋比座，好對春盤苜蓿香。

送平瑤海之雲和

蘆溝冰合送君還，依約鞭絲夕照閒。
傳翼雲霄千里捷，談經風雨一官閒。
紅蟬未了書中債，青眼聊看署外山。
記取論文舊遊處，桃花嶺下箭溪灣。

送劉行階之鎮海

梁園雪下指行旌，幾輩知心似長卿。
半職賢勞強未仕，一年離別豈無情。
江瑤柱進官廚美，紅木犀開講席明。
此去雕龍文更健，波瀾應與海潮生。

送孫咸三之新城

風厲桑乾木葉疎，綈袍寒擁廣文車。
何當潘岳分釵後，時咸三新賦悼亡正值楊時講學初。
槐市春陰開絳帳，鼉江新水上鯢魚。
長安紙貴天台賦，還待清華典石渠。

送汪攸五之寧海

白嶠看雲憶十年，故人好去展吟箋。
生徒揖讓迎師長，

山水招尋費俸錢，駿骨未忘燕市路。
烏篷先放剡溪船。
杜陵野老增離索，細雨簷花送鄭虔。

將之長安留別孤山冷泉二首

煮茶同話北山僧，欲學林逋愧未能。
一樹寒梅枕山閣，
阿誰看雪照吟鐙。

北望燕雲路幾千，重親魚鳥計何年。
詩人未了名山債，
還著芒屨到冷泉。

留別張百斯王大山姚兩方俞勛再王杜洲吳敬

數三首

卅年盟社共儒冠，草草臨行語未闌。
松逕不教閒蠟屐，

夢魂猶自繞魚竿情懷阻滯成眠少詩意商量著墨難
倘得洛陽田二頃忍衝風雪上長安

千佛名經隔紫霄重陽惆悵到今朝蕭蕭暮雨憐人舊
落落晨星指路遙學愧劉蕡偏下第才輸司馬敢題橋
如何也學公車北高挂征帆渡浙潮

歸期會訂幾經霜又恐乖違思渺茫廿載虛聲餘病骨
三閒老屋剩斜陽米鹽瑣屑難重訴肝膽分明許共將
我有慈親頭正白勞君相慰一登堂

山東道中作

乾隆庚午歲且徂擔囊躡屨之京都天高齊魯雪片瀟

吟唇僵搢貂裘裾蕭騷大風吹地起肩稜積霰冰在鬚
人煙忽斷數十里愁鴟怪鳥聲追呼牛羊蝟縮狐兔死
轅駒凍血沾肌膚茫茫四野失凹凸石骨礚礚私中途
前車傾軋後車滑王陽折坂增欷歔風鏗遠閃衰草末
不知夜宿何方隅連峯白石對面起我疑是繹還疑鳧
沂汶洸泗澤腹固誰將尺素通沈魚茂陵相如有羸疾
齒牙一動連賺車生慈炙餅難下嚙江南香稻如珍珠
黃茅煮水水不煖藥鑊空付鈔詩胥年非入洛客已晚
縱能紙貴羞今吾塞翁失馬一旦再拔成浮漫龍焉屠
范公致富非讀書顓孫干祿胡爲乎謀生遠道真迂踈

卷之八
依劉王粲空躊躇

除夕同博淵樸存二兄雄縣守歲

漂泊天涯舊布衣寒城歲盡柝聲稀每逢節序難爲客
得遇親知便當歸避債臺邊塵事少祭詩筵上燭光微
流年背我匆匆去一榻茶煙閉竹扉

元日宿長新店

柳條含凍未經春誰翦紅綃燕子頻詩卷已編新歲句
征衣猶帶舊年塵長途禮數貪從簡野店盤餐雅稱貧
料得家鄉小兒女共挑鐙火語行人

題楊忠愍公劾嚴嵩疏稿墨蹟後

月蝕凶墓日見冰載鬼盈車六鵠退騰騰虎翼趙與鄢
蛇蝎箕裘吁可畏忠良有舌奸有權權未傾移舌先碎
批鱗憤切呼黃門青天兩霜晝難晦賈誼竄死禰衡誅
從來賢路多崎嶇河套聚訟日昨事老奸側目形睚眦
相臣將臣駢首戮髑髏碧血雙模糊區區曹郎等螻蟻
乾綱一髮焉能扶七千里外臨洮謫毒霧蠻煙滿巾幘
踉蹌歸來皮骨存百鍊忠肝色彌赤不死仇鸞竟死嵩
先後捐身豈區擇孤枕未了神護持續此彈章作聯壁
鴉塗蠅凍點竄工丹心慘澹經營中焚香拜讀一萬遍
天靈下泣號陰風華亭相公霹靂手東樓灰劫分宜窮

都門款段不復出孤臣浩氣猶排空寶持此卷藏崆峒
毋教脈望饑腸充元精耿耿貫白虹

石人行

星河橫斜月在樹村墟荒荒夜難曙野外風吹石人語
長沙王喬中興主拔鞘天高血如雨陳尸千載土花纏
猶覺腥風過平楚石言於晉古有之左氏云亡怪誰補
斬蛇早已卜天心斫石還疑有神輔芟除妖孽真英雄
不爲矜人力如虎

題鄭編修炳也詩稿卽以代柬

鴛鴦湖畔詩人窟冰雪清辭清到骨袖中一卷出示余

怪底松風起蓬勃秀如女兒生春雲淨如洞庭漾秋月
有時大力攻中堅如石在山怒猊掘有時淺語亦復佳
如果在口輕脫核我本柴桑蕭散人太瘦生來吟不歇
詞壇到處蒙招尋踏破雲門舊布襪長安社結湖海豪
把臂成交肝膽揭比隣尺咫虎橋南君忘自吳我忘越
紅蘭省裡校書回日鑄出茶燒楮同話江南鷗鷺村
春波一翦明於芣漁洋老死大雅亡海內風騷危一髮
天生我輩豈無意忍使三唐坐汨沒七菹七醢堆春盤
甘美誰憐在筍蕨繁絃急管錯襍彈一曲嵇琴自超忽
此中微妙知者稀孤抱區區爲君發新詩吟罷萬籟空

眼底西峯撐突兀

登定州開元寺塔

韓公保障績桓桓此地曾經望契丹
汴水銅駝終寂寞中山香剎倚巔峒
風吹鈴語諸天細雲散曇花法界寬
渾似江南攜酒處夜深鐙火古長干

七夕武安旅舍二首

不信牛郎事經年易合歡浮橋星渚近
團露客衣單雁影橫漳水秋聲入賀蘭
南朝庾開府賦墨幾曾乾此夜更偏永
長征人獨知五陁雲汗漫三輔路逶遲
詩境明河水鄉心織女絲畫樓誰乞巧
鐙火未眠時

易水

寒風蕭蕭易水清歌來變徵襍羽聲
白衣冠送荆卿行張良之客中
副車燕丹之客中銅柱雖然兩舉盡無成
卻笑荆軻苦秦虜將軍授首誠慨慷
賢者提囊亦神武烈氣空噓貫日虹
千金七首終何補亡秦在楚不在燕
時乎未至休爭先咸陽圖籍蕭何有
督亢丹青猶在否

遊栢林寺

名藍陰森日不煖老樹周除影無算
或伏地鬱爲蜷枝或參天放作直榦
六丁雷電下取將燒牘餘青及肩短
庭前方對栢丸丸牆角猶疑棗纂纂
攢英瑣碎發妙香

天女花從半空散，豐碑薜蝕大擘窠。壁上風吹水聲滿，
清齋未足禪欲逃。古屋多空鳥爲館，文殊寂寞聞客來。
錯認檀施笑相款，青州衫子大覺宗。一盞鐙明緒誰續，
金門朝謁歸未歸。品字柴頭茶沸緩。

趙州

仲夏役塵途，風信告炎厲。來訪趙州僧，烹茶悅禪味。
落日橫前山，暖翠照行騎。蒼茫平棘城，草長無人薙。
桓桓廉將軍，白骨苔蘚瘞。平原豪氣終，朱門至今閉。
何當兵燹交，頓使繁華替。人烟莽蕭瑟，離落數可計。
陵谷易變遷，義車豈迴轡。惟有藺相如，千載神不做。

過栢林寺觀吳道子壁間畫水因作長歌以誌之
君不見東南大地之水稱汪洋遠趨日本連扶桑畫師
要與元衣使者鬪驅入趙州東郭祇園牆油汨汨汗汗失
涯涘一筆兩筆分低昂衝飈怒轉勢倔強陡然起立波
爲揚我聞江深五里海十里今此下窺無底誰能量回
頭忽見墨痕變馮夷氣靜開生面慈航寶筏來有無尺
咫蓬萊水清淺浪皴靴紋削可平并刀翦取澄江練長
康漫誇元武宮思訓羞傳大同殿學道曾參觀水術探
奇復作畫水歌良工下筆畏缺漏文水武水胥包羅願
以天瓢汲泱泱用澆半生習中抑塞不平之坎坷憶昔

南浮淮泗北涉洪河乘風欲破萬里浪文力橫截生鼉
鼉胡爲乎萍流梗泛隨秋波珊瑚生枝不在網圓折方
折誰觀摩浮槎有人天上去中洲無梁那得過吳道子
吳道子但知畫水焉知他吾其衰病嗟蹉跎水平水平
奈爾何

井陘懷古

二十萬眾鵝鵲羣戰場兵氣盤網繚交深刎頸尙爲敵
誰甘効死成安君佐車獻策策不用追奔士卒鳥獸分
井陘崎嶇失天險赤幟捲盡中山雲泚水波紅腥血雨
淮陰作歌張耳舞君臣朋友皆義維蓋世功成義如土

漢高卽是常山王
荆通之言勝廣武
無人能解局中迷
莫笑陳餘竟爲虜

真定旅中四首

寒食東風杏始飄
慶都山郭酒旗招
野塘春漲拖驄尾
板屋人煙上柳條
慕義至今多樂毅
憐才終古感燕昭
殘碑拂拭高賢里
芳草青青正沒腰

蕭條短榻對茶煙
正是清和首夏天
欲寐恐成遊子夢
曰歸未辦買山錢
吳融著述終思越
鄒衍生涯不在燕
極目平田真似繡
菜花香裏展吟牋

支離病骨嬾於蠶
每遇新晴興獨酣
活水分畦常脈脈

斷雲依檻尚潭潭
天邊雌霓橫孤塔
林外斜陽帶暮驂
磨洗恆山三百里
佛頭青到郭門南

秀萼飛蝶自雙雙
繞屋陰濃樹色龐
涼雨過時方就枕
好山多處別開窗
詩情酒話餘三篋
帽影鞭絲又一邦
孤負家鄉櫻筍社
鱖魚已上富春江

謁楊椒山先生祠

辛苦楊員外
孤忠鑒是誰
飯澆寒食社
苔繡夕陽碑
古廟靈旂在
春風客淚垂
丹青懸素壁
兩䟽照鬚眉

望都道中

落日燕南道
行行出郭門
人煙生遠近
溪水閒清渾
交

影樹橫岸帶聲鴉過邨山陰風景似鄉思與誰論

過宋文貞公園林

千章老木覆平原幾閱滄桑剩綠垣腸斷雨淋鈴一曲
卻因丞相憶開元

秋草

霜白天高鴈影空平原秋草接飛蓬淒迷夢渚煙波外
蕭瑟咸陽落照中寒入馬蹄連絕塞細聽蛩語怨西風
孤根生意綿綿在猶映黃花四五叢

和吳秋漁登愍忠寺藏經閣原韻

飛檐淩木末鈴語愜幽情空翠手難拾妙香心共清佛

依天尺咫雲與客逢迎盡日支頤坐山光滿眼生

市河曲

市中河濁瀾瀾一石水五斗泥居民飲之甘如飴

膠漆歌

漆投膠如一氣兩姓多金用無既膠投漆不可分同時
冠蓋將凌雲轉瞬升沈此殊彼膠不粘塵漆如水

荆山玉

荆山玉價重懸黎并結緣可憐出山復入山侯門別盡
山人足一朝顧盼良工師破涕爲笑新相知傳示美人
不釋手楚王下殿親捧持玉雖無恙鬢已絲何不相知

初獻時

古鏡篇

咸陽廢井汲綆空居民掘得軒轅銅乾規制度諦完善
土花繡澀堆青紅寒光內蘊失昏曉如雲翳月猶朦朧
背刻伽盧左行字還疑史籀繆環通上列丹山九苞鳳
旁纏紫渼雙驪龍千金賣市人莫辨水銀之液磨國工
頃刻菱花吐真形金鑿升漢光熊熊照心照膽兩奇絕
野人拜獻秦王宮秦王宮人知愛惜玉臺好對塗黃額
什襲而藏寶匣中冰淨形容轉相隔珍奇見用不見親
何異泥塗幾千尺殷懃拂拭兜羅綿暮暮朝朝近膏澤

清明氣質終不渝願事紅顏到頭白

金橘得豆字

華芳過霜林歷歷摘星宿葉密易潛藏筐踈恐挂漏味
爭諫果先色映黃花後初驚汞鍊成還疑蠟塗就勻於
上苑櫻碎奪平陽豆拋林共彈飛傾盤迸珠走甘美指
難分馨香鼻堪嗅圓融神理全細膩風光透儵藏陸績
懷瑣屑殊難究

發家書獻兄菊坡

蕭條仲冬月漂泊長安館棲鳥寂無聲鐙青動風幔熏
爐撥寒灰敗壁雪侵案緘書復開書爲君起長歎舊遊

憶西泠僧窗幘同岸泉響斷續聽花氣淺深判茶鐙就
竹烹漁船隔林喚觀梅過張園屢屢歲忘晏先君棄中
路南北折飛鴈我病君未歸君歸我重竄人壽知幾何
堪此久離散背我別慈親鬢髮白已半還虞三載餘盈
頭雪燦燦古云一日養不以三公換爲人作嫁衣偏暌
寢門畔琴女已長成恩聯齒將冠非無良媒妁難締貧
親串仰事尙無資婚嫁敢憂慢昨聞衡耆言五十當仕
宦來朝事盈虛今夕且難算前途遠蒼茫其言恐河漢
誰能忘故鄉餬口苦羈絆十寐九不成何不夜爲旦雲
水城西莊柳陰憩可鍛魚苗春水肥菱角秋汀亂矮屋

未支離綢繆葺瓦墁得買負郭田與君老谿澗

出南西門偶成

細草寒花逐徑生夕陽微照板橋明紅塵堆裏抽身去
一坐秋根聽水聲

、遊查氏園林二首

城市紆迴隔煙霞次第侵沈魚憐月靜老樹得秋深每
涉林巒趣常生隱遁心蘭成小園賦倚檻動長吟

虹梁閒步好鶴跡未曾淹石氣青扶閣花光澹撲簾陰
晴雪不散詩酒客能兼欲別重回首藤蘿罥帽簷

送俞璿之大名

帽影鞭絲柳外明
半車書劍促登程
空餘清淚雙沾袂
愧乏黃金一贈行
積雨白連雕馬渡
亂山青到武陽城
勉旃此去俞都講
指點雲霄羽翼生

遊靜默寺

梵界入青虛
塵市亦不惡
妙香空中聞
流雲過高閣
日斜樹影交
人稀鳥聲樂
鐘魚兩沈沈
鈴語在屋角
閒庭潤數弓
牆陰逕如削
磚紋半參差
青嵌細鴨腳
徘徊石闌東
風定一花落
聊持長柄匏
俯彼井泉酌
寄語素心人
何必尋邱壑

訪蔣五承炎寓玉泉禪院賦以代柬

玉泉精舍空王家寺門雪積恆河沙珠旛飄蕭魚磬寂
春風初拂陀羅花城南尺咫若天末伊人秋水懷兼葭
殷懃問訊兩相左時時目送歸飛鴉華林挂冠北來苦
司馬青衫濕如雨眼前更有失意人可憐菜圃英雄腐
岑參兄弟吾舊交漢陂之遊在湘浦酒瓶茶具羅縱橫
水仙花梢過柔櫓平橋月落南斗斜脫帽松根蕉竿舞
星霜彈指十稔餘各趁輪蹄別鄉土今日長安底事閒
依然筍對西山挂人生行樂須金多黃金不多可柰何
客乎客乎胡爲者巷前齒冷雙銅駝

泊鵑山房集卷十七終